

LOS OFICIOS TRADICIONALES: LA CESTERÍA

...Facía los goxos
El mes de xineru
Y por el veranu
Cobraba'l dineru.
Aquí está la vida
Del probe goxeru.
¡Si mio probe madre
Volviés a abrir el güeyu!



[Eduardo M. Torner, *Cancionero musical de la lírica popular asturiana*, 1920]

Con ser ún de los oficios que meyor se salvaron de los cambeos de la modernidá, la cestería ta desaniciando d'un tiempu a esta parte. Anguaño tornóse un facer ayenu a la xente, avezada a otres maneres de caltener y acarretar les mercancíes nun mundu d'hipermercaos, entregues a domiciliu y filoxes de plásticu y paxellos sintéticos. Lo poco que se caltién hai que dir buscalo a l'Asturies rural, y nun siempre sedremos p'afayalo ende.

La esposición *Los oficios tradicionales: la cestería*, organizada pola Asociación d'Investigación Etnográfica Escontra'l Raigañu con motivu del Beltaine 2010, entámase col enfotu d'averar a les persones que vienen visitanos a otra dómina y a otra manera de vivir y desenvolvese: los tiempos nos que s'estilaba mercar los macones de Peñamellera, porque yeren los más afamaos; los tiempos nos que se dexaben tola nueche na mar les nases durmiones pal centollu y l'andarica; los tiempos nos que les paisanes acarretaben pal mercáu fabes, patates y güevos en bones cestes de banielles.

La esposición complementáse con una amuesa fotográfica preparada n'andecha col Muséu del Pueblu d'Asturies de Xixón y allugada nel corredor, onde bona parte de los materiales espuestos nel andar de baxo podrán vese nel so contestu rial: l'Asturies d'antaño, sobre'l papel con toles sos lluces y solombres.



Es tal la abundancia de sardina con que arriban a puerto las lanchas de esta matrícula, que ayer se vendían a real el *paxu*. Es de advertir que cada *paxu* puede contener de quinientas a mil sardinas, resultando por consiguiente que cada comprador llevaba por un real cuantas podía apiñar en el *paxu*.

[“Noticias regionales. Avilés”, *El Noroeste*, llunes 26 de xunetu de 1897]

